

稀見地方史料叢書

學苑出版社

中國稀見地方史料集成

董光和 齊希 編

中國稀見地方史料集成

第二五册

海虞別乘·三

浙江通省志图说

浙江全省輿圖並水陸道里記·一

學苑出版社

浙江

PDG

(明) 陳三恪纂修 清抄本

海虞別乘·三

車推弓之製率用手剖去子線弦竹弧置案間振
掉成齧厥功甚艱元初有一嫗名黃道婆者自崖
州來乃教以做造捍彈紡績之具至於錯紗配色
綜線紮花各有其法人既受教競相依倣家既就
殷嫗死為起墓立祠焉輟耕錄

按吾邑種植木棉紡績成布蓋自元末始所以
宋寶祐元至正間志並未載木棉云

明

徐昭者國初莫城人也家臨河河嘗有一打生船泊

馬徐善遇之船人素飲其德思所以酬之而未能也一日其船離河久忽相遇于莫城之野船人曰大德久不報今君移船遇此此天意也發土三尺許下皆銀取銀裝徐船以為報我亦從此謝打生業矣蓋此地為晉元帝時青州地州徙庫湮而銀即青州庫中物耳今尚有青州橋也此亦可補志乘之遺私志

國朝承胡俗貪縱之後法用重典為士者多樂田野罕事進取甚至縣學弟子員不備往責人保充

嘗聞家嚴言洪武時縣檄姚公伯善應試公衣襪
襖逃田間兩手拄耒而戰慄猶為里胥群捽而去
竟列高等舉孝廉授職工科都給事中自紀

洪武二年初河陽民朱蝦蟆聚眾為亂夜突入劫庫
將據城叛邑令李公章調民兵平之蘇州太倉二
衛聞之變提兵來將屠城章持牛酒犒師曰賊已平
良民無預也公等宜還師未幾高皇帝遣王御史
來視城邑如故人民安堵迺趣解兵民賴以安自紀
故老相傳吳文恪公樹綽楔於李家橋不擇日有術

士曰是日犯七殺宜避忌公不聽及坎土果見七蛇衆謂此七殺之驗也公命棄其蛇於數里外迨今李家橋三里內外居民不祀土神涵過其地詢之良然

陳德涵附志

常熟之穿山有農家止生一子名保：肢體柔軟四五歲猶不能行終日坐木榻上善言人禍福扣之皆應其家固怪之然亦因以致饒裕故不成之一旦有龍虎山道士過其門語人曰此家必有妖物富人劉以聞則之召道士問曰若能除之乎道士

曰不難也劉遂具舟使往道士方行保、忽告母
曰有一道士來兒當死矣可與錢十千為兒乞命
母方怪之道士已在途潛書朱砂符焚於道旁柳
樹根下保、已在家嘔血又行不久再焚一符則
有一鱧死於水面長壯可畏其首大如拳問其家
子死矣姑蘇志

吾邑林黃合譜黃給諫鉞從女弟適吳本以節聞其
兄林剛伯疏請於朝乞表其閭上賜翠花二壓步
二壓步袞帶以下飾今不復見私志

景泰間歲運悉由於海自吾邑福山港達維揚動遭
颶厄溺者萬計有漂江達於吳浦諸處吳浦人錢
洪恒命善游者拯之錢氏譜

成化間禮尚書四川劉公岌年六十無子妾生一子
夫人妒之斃而委諸隍間一部吏過之間啼聲察
之為劉氏子持歸與己子並育數歲鄉人吳主事
某知其事以告公公遣禮幣迎歸試使認其母於
諸妾中子竟就所生者母亦以子體中數黑子為
驗後以蔭授中書舍人岌醇謹士也人謂宜其後

者都御史劉公果言之其吏為蘇常熟人

近峰聞略

錢曄常熟之富人入賞得授浙江都司都事豪壓

一邑知府楊貢訪朱漢房御史曄在焉衣服鮮美

而語言容止並復都雅貢敬之既去問得是賞官

貢始悔恨曰此吾部小民何敢與吾坐手惡之曄

之寓舍在泰伯橋下先是指揮何某喚角妓教人

供宴舟載經曄寓適曄亦方宴客截而有之何由

是銜曄至是每短曄於貢貢既深惡曄得何言益

怒於是事收之下府獄吳人大喜貢具本馳奏

曄之輩如劉以則等數人皆大家也平日相結為友見曄敗有齒寒之愆各助曄銀五百兩必欲勝貢曄家僮奴數百人多有智能者貢之本既發上道曄家人隨焉詐為附舟者與賈本吏一路游處卒賂之發封竊視盡得其所奏情罪辭吏先往預以本進焉一一皆破貢所論者也後三日貢本始入同下巡撫都御史鄒來鶴推勘鄒特欲扶曄故遲之以貢難抑不敢決初曄之在獄獄囚夜反知縣聞人恭白貢請乘勢棒殺曄貢不肯曰是何得

好死獄中貢意蓋欲顯戮暉并沒其產也及鄒既
為暉獄久未成暉遂使人以貨謀於權貴乞同提
至京理對於是貢與暉皆就道北行初將朝審時
方嚴寒暉賂校尉五更已縛貢縛繩至骨又不與
飲裸冷欲僵莫能發一語暉則飲酒被裘至臨入
始一縛焉於是貢詞不勝貢至刑部尚書某曰楊
知府汝作街頭榜用牌兒名綴語此時已天奪汝
魄矣尚何言初暉進本自署浙江都司都事至是
刑部覆不言貢以知府按暉事但言以都事與知

府訐奏事勢相等又曄與貢亦交有所論於是論
貢與曄皆為民吳人寬之貢誠清苦無所私其收
曄亦深欲抑強而自立也公不勝貨事遂以壞惜
哉然於貢亦何損焉當時僉事湯琛賦一詩紀之
蓋幾千言語雖俚鄙皆述寔也詞多不載貢既去
郡甚貧還家布衣破帽教授以自養近始即世曄
死子亦老死家中將死前月餘所乘馬尾一旦盡
落人謂絕後之兆方曄盛時其享用等封侯園池
之勝為江南冠嘗於池上築一亭夏月宴客則登

馬客既集則去橋不得輒去亭皆四空嫌日色蒸
照則取大方舟寔以土上種名花作高屏視日所
至牽而障焉 說聽

楊太守貢初至祀吳泰伯廟而錢曄寓其旁錢例
授浙江都司經歷奉茶入獻同僚為道其賢貢一
訪焉他日以詩贈浙江翁都指揮紹宗紹宗頽之
於堂何指揮者惡曄言於貢曰翁列公詩善矣奈
何與錢曄同懸曄鄙民也敢與公等貢大怒亟入
翁家自持其詩以去未幾曄奴以雞腸擲其鄰寡

婦家婦謂其挑已訟諸府貢挾前忿捕暉下獄廉
得其賊殺不辜事將論於朝其兄所為之經營而
暉不愛其賞以賄當道巡撫而下皆有所贈於是
監司奏二人同僚不睦下獄及御問暉襲裘而入
貢寒甚噤不能吐一詞遂誣服罷官不平者作長
歌叱之或言周岐鳳所為也陸氏詩紀

附錄楊貢字彥魁樂安人正統己未進士任石埭
知縣以治最陞監御史彈劾不避權勢景泰甲戌
按治蘇松常鎮值歲大飢以便宜發免軍米數

千萬石計口賑急民賴以甦上章請罪賜勅褒獎
陞蘇州府知府輕徭役蠲逋負民謂之楊青天郡
有富民錢曄者武斷鄉曲貢取寘於法都御史崔
恭庇曄劾貢欺罔坐免官給事中馮昱御史陳選
疏貢無罪不報民皆稱冤休老於家介然自守不
以事干官府號雪艇有文集

撫州志

按錢曄事所載異同如此大都銅臭大猾橫弄
風雨一時如劉以則者皆朱家郭解之徒為之
揮金納賄撫鎮大吏与大司寇皆受莫金抑廉

吏而黨豪民天日為之晦冥矣當時古道猶存而法司有此讞法舉朝無一人指摘亦異事也然擘馬尾兆禍竟斬厥祀謂非天道哉

常熟一農夫農時縣令下鄉從吏某農故人也邀入室厚具以款吏且曰吾積歲稔業頗進益君侍縣官敢以全家相托吏輒利其財還縣囑犯盜死囚誣農富主農墮其計委命於吏必能覆己也因而傾家未幾吏病死農白晝見吏入室農曰怪哉其人已死復能偏我手是夜農家生犢犢腹有白文